

ՅԱԿՈՎԲ Դ ԿԱԹՈՂՈՒԿՈՍ . — ՌՃԻ . = 1672 ՕԳՈՍ . 28 .

(Լուեալ զի Նիկոյ . արքեպիսկոպոս կոչեցեալ է ի Հռովմ, և ոչ գիտելով երէ դարձցի, առաքէ զԹեոդորոս եպս . վարդապետակն՝ ի տեղակալ, և յաշորդ):



Ի ՍՈՒՍԻ Գրիստոսի ծառայ Յակոբ կաթողիկոս կաթողիկէ եկեղեցւոյ Հայաստանեայց, վեհ և վերադիտող ամենայն Հայկազեան սեռի, և պատրիարք ի վաղարչապատ քաղաքի առաքելական աթոռոյ, ի տեղւոյ Իման Բանին Աստուծոյ . տեղապահ և յաջորդ աթոռակալ և փոխանորդ մեծահռչակ տեառն մերոյ և հօրն հասարակաց Սրբոյն Գրիգորի Լուսաւորչին . Յորմէ ժամանեալ հասցէ նամակ աւրհնութեան և քարտէզ պահպանութեան, հանդերձ լիութեամբ վերնահոս շնորհաց և յաստուածուստ առատարուիս պարգեւացն, ի վերայ ընդհանուր հայկականաց տոհմից և թորգոմեանց սեռից, որք ի Լեհաց երկրին բնակեալ են . մանաւանդ ի տիրապահ և ի քրիստոսախնամ քաղաքին Լուվայ, երկնահրաւէր և սրբանուէր քահանայից, արդարադատ և խորիմաստ դատաւորաց, և ամենայն առհասարակ եկեղեցականաց և ժողովրդոց, մեծաց և փոքունց . Առաքելական աւրհնութիւն և լիութիւն աստուածային շնորհաց . Շնորհք և բազմապարգեւ աւրհնութիւնն ծագեսցէ ի վերայ ձեզ և ամենայն գոյականացդ, և ամենայն ազգականաց և բարեկամաց ձերոց, յանսպառ աղբերէն աստուածութեան և յանմատոյց լուսոյ եռալուսնեան զուգակցութեանց հանգունատիպ Երրորդութեանն, Հօր և Որդւոյ և Հօգւոյն Սրբոյ . ամէն : Այլ և բարեխօսութեամբ և մաղթանօք ամենասուրբ Կուսին Մարիամու Աստուածամօրն, և որոց իշխանութիւն ի վերուստ տուաւ ի վերայ երկրի՝ երկրաւոր և երկնաւոր բանալեօք տիրել ազգաց և ազանց, մանաւանդ երիցս երանելոյն Լուսաւորչի մերոյ Սրբոյն Գրիգորի, և ամենայն երկնագումար խմբից . գերալոյս և գերահրաշ մէզն աստուածութեան ի ներքոյ վարագուրին բնակեալ, և ճառագայթիւք ահեղ բարձրութեան պարածածկեալ ծաւալեսցէ ի ձեզ զլոյս աստուածգիտութեան, և առատանուէր հոսմամբ և բազմամասնեայ յաճախութեամբ մեծին երախտեաց ի ձեզ ամե-